

四庫全書

集部

欽定四庫全書

浮山集卷四

宋 仲并 撰

奏議

蘄州任滿陞對劄子

臣聞聖人之言萬世之法也雖甚愚不肖可以終身服
行雖賢且智不可一毫加損臣不佞陛下歸者使臣承
乏淮郡陞辭之日告戒丁寧謂邊郡與中州不同且申
敕之曰其治貴簡大哉聖人之言乎臨下以簡二帝之

極治居敬行簡先聖之明訓區區焉每事務為煩碎而不求至當之歸則民滋不安事益不濟施之一家且不可況敢施之一州又可施之邊陲乎臣佩服聖訓朝夕在是二年之間雖至蒙陋獲以理去此陛下父母之甚慈訓誨之明效也臣今再望天墀願紬繹貴簡之義復以為陛下獻竊惟淮甸之民自頃離兵革今四十年餘賴陛下仁恩德澤生存長養愛撫備至然臣今視之田萊之荆榛未盡闢閭里之創殘未盡蘇兵息既久而瘡

瘠或尚存年豐雖屢而啼號或未免鋤耰耘耨皆僞寄
之農夫介冑兵戈皆烏合之士卒市井號為繁富者纔
一二郡大槩如江浙一中下縣爾縣邑至為蕭條者僅
有四五十家大槩如江浙一小小聚落爾衣食無以自
存追胥有所不忍不以至簡臨之其不烏竄鼠伏捨城
邑而他之者鮮矣益仰聖主之明見萬里之外如此臣
愚伏望申發德音明諭至意深戒郡縣咸知貴簡之實以
牧養小民為先以清心省事為本以勸課農桑為最無

他術也一本於簡夷則民安且樂郡以無事且使聖主
一時之言為萬世守邊之法不亦善乎若夫含糊萬事
優柔不斷宜速而遲坐失機會當斷而止無意事功詰
之則曰吾方貴簡云爾此公議所不與而夫子所謂無
乃太簡云者徇名失實去本遠甚人當有受其弊者有
一於此伏願聲言其罪必罰無赦以謝斯民取進止

第二劄子

臣聞兼天下之智則智無不燭合天下之謀則謀無不審

帝王端拱一堂而坐照四海舉無遁情用此道也臣竊
惟陛下日御便殿躬覽萬幾雖祁寒隆暑曾無怠容監
司郡守異時門辭而往門見而來如是止矣陛下臨御
凡曰分符持節奉命而行與既滿秩而歸皆得從容歷
丹陛奉玉音殆旦旦如是臣子之至榮極幸也人人晝
度夜思咸欲自奮以裨聖治之萬一豈無芻蕘之言上
契冕旒之聽者然人才實難既不能一一盡善往往或
不思本職泛論其他迂濶者為落落難合之言不切事

機下焉者瑣瑣碌碌初無深計遠謀殊失聖朝咨訪之本意甚無謂也夫治道之是非邪正聖心固已洞達無遺所欲聞者四方之利害得失爾臣愚欲望睿慈明降詔旨自今監司郡守滿秩而歸各許明言所職與今日所見所聞某利可興某害可除某所之某弊當革某所之某蠹未除一一條陳盡言無諱不尚文詞不貴枝蔓庶幾千慮有補毫分且使羣臣平居舉無他念常存心於職事間思以報上若夫獻納論思講明治道近臣之

任非疎遠所敢知取進止

書

上宰執書

某竊見嘉祐初忠獻韓公為樞密使嘗言國朝機要文字盡在密院歲久散遺蠹朽多所不備請差官於諸房討尋編錄一本進內一本留樞密使廳以備經久之用於是編集自建隆以來以歲月先後事類相從書成上之為千一百六十二冊韓又言嘗任河北見祖宗所下

詔令皆契丹未講和以前經武禦戎之事請下本院編錄於時再集端拱以來宣勅劄子為六十卷又熙寧中密院乞將祖宗以來法制所宜施行於久遠者刪取大旨著為畫一及聖政釐革條章以次紀其事曰兵制曰馬政曰邊防曰敵人曰屬國曰城守曰器械曰捕盜曰選材曰責效亦各以事類相從如兵制一門凡招揀屯戍訓練之類皆附見焉其他類此詔以經武要畧為名仍令逐門各留空紙以備書載將來處置事件仰惟祖

宗創業垂統經武禦戎成算大定昭若日星貽厥孫謀
著在方冊垂億萬世可舉而行宜乎累朝加意編纂常
懼散佚今閱歲滋久不但散遺蠹朽如韓所云蓋殆無
片紙存者某重惟韓所見祖宗詔令皆在契丹未講和
以前又如要畧所列七門皆今日急務與其泛求他人
之議孰若一遵祖宗之詔訓耶欲望就委樞密院官屬
如嘉祐之所編千一百餘冊與宣勅劄子六十卷及經
武要畧之書搜訪全編上之御府各以一本留三省及

密院若又自熙寧以後至於今日凡措置邊防兵制等事宜可以附載要畧者亦委令講求編摩次以歲月要在悉備官有替移後來者相續編纂成書使祖宗英畧審謨與一代成憲粲然復見於今可傳於後實天下幸甚其間有利害切於今日當即施行者令編次官備錄首尾節次申三省樞密院言或可採伏乞鈞慈詳酌施行

序

原弊錄序

務曰雜買場曰雜賣至猥局也官之監臨於此至賤有司也以賤有司而理至猥之局事掾過目前得無笞罵足矣書之於冊若奉一大事然豈不陋且愚哉雖然賤有司之意以謂天下之弊自其微者察之則其弊易見凡百有司唯至賤者乃事事親之則其見也審上之人因賤有司所察之微而移以察其大者又因其所見之審而將事事加審焉此錄或有取也若止以曰雜買曰

雜賣觀之而已非賤有司意也無庸觀也名曰原弊而私竊叙其意焉

贈筆工序

書不擇筆非至能書則至不能書者也余平生不知書法見筆輒書未嘗敢擇以故筆工精否優劣亦懵然不能等級差次之今日試某人筆則雖予之至不能書亦知其為工知所擇矣

跋

跋蔣穎叔兄弟與其姪宣卿詩

乃知貧賤別更苦吞聲躑躅涕淚零此少陵別其姪勤
詩也出守吾家姪殊方此日歡此宴忠州姪詩也嗣宗
諸子姪早覺仲容賢舊諳疎懶叔須汝故相攜此皆寄
其姪佐詩也每誦其詞見其於猶子勤勤親愛之蓋不
啻其子可以見少陵孝友有餘仁厚之至也大師蔣公
賡唱二詩其得少陵之心乎唯二父能知龍閣公於少
時龍閣公不負二父之知於今日此詩尤可傷也少陵

諸姪其後不皆有聞而龍閣公出入踐更顯名當世過少陵諸姪遠甚亦見二父於猶子中非苟親愛之如此
題吳興沈師所藏米老帖

此老無恙時此帖家家有也今墓木不啻拱矣鑒逢真主價長千金流落人間者真太山一毫芒今日見此帖病眼頓醒展玩久之因語冲虛師其亟由間道以歸非余勉同忠恕法當沒入也

記

後樂堂記

宣和二年十月敵起清溪入睦入歙入杭蹂十州之地
間以兵圍信不克天子為出禁旅付大臣討平之初青
谿民阻山為暴吏不得制寢劇部使者不以聞益放兵
無所忌至政府寺畧人民由是東南皆警時守州令邑
者疆比壤連無一人奉尺書為朝廷言者獨信州王君
曰敵興篁竹間不旬日其鋒如此勢非可以朝夕破者
今不百里俯吾境萬一不戒如吾民何即斥金帛募士

增陴浚湟修戰鬪具按蹊隧所通者二十餘所悉以兵
戍之用通守王侯策起其屬高志臨付以軍政條便宜
章十餘上且以計策告當路之用事及城守者十二月
敵覆浙東軍張甚頃之焚婺源開化屢以兵徧信知有
備引去正月攻江山常山殘之於是繚信境數百里皆
為敵區君居其中部勒諸將益嚴與王高二侯戮力締
謀屯韓巖以扞開化屯館頭以扞常山屯竹巘以扞江
山率深溝固壘日揚兵境上為不可測者獨柳家都不

為備匿精甲數里間志臨以親兵仆旗鼓踵其後敵果
虞三戍之衆不敢犯二月既入衢則鼓行寇柳家都營
險峙糧益毆人為兵欲必舉信初以偏師嘗我克之已
而盡銳攻號十萬志臨出奇兵鏖擊果大敗拔營去追
奔數十里焚蕩俘馘至不可勝計縛其偽統軍以獻因
分其兵為三一自韓巖復開化一自館頭復常山一自
柳家都復江山長驅迅卷遂復衢州敵之在他境者皆
望風遁去東南以平於是天子下詔曰信州愈斬敵有

功其進職若官殊等通守舜舉亦裨贊之良也增秩次之而以志臨為衢州君與王侯既相與侈上之賜而喜釋於守城之勞也迺築堂二曰示喜曰後樂而書其本末來請某曰天下之事所貴於智者以審於禍福成敗之幾而圖其大者區區一時勝負之功不足議也方敵奮於承平百年之餘民不知兵吏不知守獨君察於幾微慨然以書抵在位者或非笑或怒且排詬之卒之無一不如君策及情見勢屈而向之為吏者方狃於故常

曰吾知謹簿書期會而已吾書生也何以兵為選懦譎
張爭為完軀保妻子之計視刈其民如草菅然而無以
善之曾未有奉一州六縣無秋毫之失歸報天子如君
者而余顧以為區區一時勝負之功者誠以信於江南
為四塞地使遂其吞噬之心西搖撫南闕建北擾宣饒
則雖磨以歲月未能遽下也唯君以方千里之地屹然
於橫流奔沸之中扼其吭咎其背使氣奪力殫不能尺
寸進卒夷其衆當是時並江循海三路三十餘州皆堅

壁清野倚君為重則君之建立為何如哉是宜天子差功第賞書君令甲而信州之名一日暴於天下則斯堂之以喜樂名者君與信人果得而私哉君通經術長於吏治所至皆可紀始君之至州無十日之贏既二年而鏹腐粒陳以之賞功募士調兵食皆出於此可謂為政知所先後而非偶者可歌也已乃作詩曰惟帝奠治以天為區藐彼南服大江之隅八聖休養徂於丕平有不
能馴嘯呼以驚奮厥端螻敢仇王師帝顧在列孰予往

咎矯矯禁旅統之公侯春禡於野旋師麥秋囚獻刑得
第勲策勞孰固吾圉予其汝褒在列咸啟信為偏壁迺
褒選鋒爰按走集敵屢闔境引師環之一遇鏖擊崩奔
不支坐於城堞扼其三方隣國仰首如川得防帝曰俞
哉唯女之力錫之命書光寵而國愈拜稽手敢揚王休
迺作華屋睇山俯流君在新堂寄適雲杪里民戶歌雜
以嬉笑君在斯堂賓客粥粥間於憂虞起舞相屬民祝
君壽長為父師毋或去我貼於塾危士曰君材維試之

仍如何此州私我賢伯凡厥本標載之民謠來者是式
君將在朝我為頌詩繫史之訂匪民之私天子之慶

趙公遠祠記

乾道四年夏五月天子命直龍圖閣趙公守吳郡未踰
年訟理政平郡以無事民所願欲不請而獲明年四月
祠故侯趙公從民望也先是建炎三年趙公來臨此邦
於時敵人南侵環千里之地兵氣四合東西數大藩戎
馬奔軼所過輒下或挈老稚空城邑去之公初至慨然

言曰朝廷所以列方面置牧守豈適為平時計哉亦惟
一旦緩急免斯民於阨危爾指城池言曰吾知死所矣
姑盡吾備焉不濟死未晚也已而敵勢日張鄰郡之民
或走險阻以自固邦人請於公公曰非計也湖水鄉爾
我能往寇亦能往將安避迺率將士戮力乘城艱難
辛苦同之天寒日晏士卒未食不敢食中夜以興疾風
暴雨不避人皆感勵願以死守禁旅數十輩詣公言曰
敵至矣人人願為戰詰朝盍授甲公曰敵去我遠近我

豈不知之須爾曹告耶且爾曹豈真有戰心哉一旦懷
甲出入小則驚里閭甚則刼太守以起亂爾然必欲擾
城邑亦安用甲為公折其謀逡巡而退敵勢益迫公號
令益精明衆恃以無恐願闔門二百指言曰守土吾職
也不敢顧其家敵來吾以身先之爾曹同一死爾他郡
間有嬰城自守者往往屏息偷生一夫搖手衆皆惶怖
敵未至民已困且弊公從容暇豫無異平時城闔早啟
晏閉民得自如初不知敵人在吾境也或謂敵且浮舟

而來公迺厚募没人水行以鑿敵艦誅巨木沉廢舟以
絕間道短衣毀服出入民間民之利害纖悉得聞民有
負薪及門門卒難之因留不與公聞呼門卒痛懲之且
謂曰一束薪細事爾平時強取於民猶不可今何時耶
豪強斂手一毫無犯公倉卒遭變迺應之從容智畧輻
輳雖平時出入兵間者自以為不及也事甫定公遽罷
去命下之日居人如將去父母攀戀涕泣思所以挽公
者百計御史以民言告於上詔還公於郡又數月而竟

去嗟乎敵人踰河及汴自汴及淮自淮及江連江浙十數郡地方數千里若涉無人之境武夫悍卒莫敢嬰其鋒卒無一人保土疆人民為朝廷報志士仁人顧嘗念此是為兵不足用民不足守亦城池不足恃以固耶今湖蕞爾邦且沮洳地也無蚍蜉蠃子之援公獨以此抗方張不測之敵左支右吾卒以無事至今為樂土華屋填城耕桑四墅歲時士女遊觀軒蓋遮道不知出於兵革之餘也謂兵不足用民不足守城池不足恃亦陋矣

民去公愈久而念之愈無窮每裴回溪上顧瞻太息君
蒿悽愴如將見之私相謂曰微趙公之賜不及此然廟
貌不設無以揭虔妥靈而寫予思且今耳目所熟公之
功不可掩已他日傳聞異辭謂全活吾民者公耶其誰
耶告於郡屢矣今使君之來順民之心一請而從之初
欲祠公於慈感精舍曰是浮屠氏之居豈足延公惟唐
魯郡顏公之祠英風義氣凜凜如生邦人奉事唯謹虛
祠之東偏理若有待盍以是寓公之祠衆曰宜哉即日

迎公像於堂邦人踴躍駢觀儼然望公我冠正笏若指
麾於一堂之上攘却彊敵於談笑間也使君屬某記其
本末以蕪陋辭不獲迺取鄉人之言一二載之為迎享
送神之詩併刊之於石使邦人歌以祀公公諱子麟少
年登進士第吏能精敏所至有聲蓋神明之胄云公遠
其字也辭曰桂楫兮蘭舟望我公兮中流環四山兮暮
雲合侯何之兮不我留百堵兮千室公手拊摩兮德無
極脫我兵氛兮遺黍稷弁維峰兮茗之水山與高兮澤

瀾瀾來遊兮溪濱歌舞兮吾民坎坎兮擊缶雜羞兮
奉卮酒薦芬芳兮邊豆靜好侯歸來兮不嘯以笑時節
然嘗兮無我民違民危與安兮今豈忘之鬱初懷兮幾
時匪今侯兮疇慰我思凜凜乎英風越異世而同宮佑
城郭兮益無已貽今侯兮壽多祉

贊

黃夫人傳神贊

氣冲而醇神湛而凝淑範徽聲宜宗姻而瑞家庭在子

若孫克孝以寧仙氣餘韻寄此丹青傳千萬祀尚想見其儀形

行狀

故左朝請大夫權發遣撫州莊公行狀

公諱安常字子尚其先出維揚後徙常之宜興至公三世矣世以儒術長者著稱鄉閭自僖簡公以道德文學被遇徽考敷歷中外為時名臣莊氏之門益大公少簡重既長乃獨彊敏於學偕其昆季有聲庠序間僖簡既

通顯得任子次且及公公不以門閥自侈益攻苦為文
試有司率居高等遂擢政和二年上舍第時僖簡方持
使者節於外第名之日徽考臨軒知公僖簡子願輔臣
曰此莊徽子也容止甚似其父由是輔臣知徽考故不
忘僖簡即日自兩浙轉運使召還公亦亟被選擇列於
學官公初以黃甲授青州益都縣主簿未赴改監惠民
藥局又改廣親宅宗子學正二年為太學錄又二年為
博士時外制簡嚴不輕褻予公之遷博士也獨盛稱學

行之美既試可觀且曰賢關養士衆建師儒茲焉有稱
朕必因任蓋公之遷用士大夫之望如此公自初聲名
籍籍既為成均先生士之執經請業者相屬皆得所未
聞又嚴憚公不敢為纖芥非義終歲所隸弟子負升合
選者比他博士所隸為多亦常無一人附麗於罰者有
司奏課稱最衆人趨競權門美官顯秩如意而得公獨
蕭然與諸生商畧經旨以獎進後輩為已仕期不負所
職而已同列聲名出公下者反超擢光顯無虛月姻故

皆盛言撼公公曾不少貶方力勾補外踰年改秩提舉
京西南路學士丁僖簡憂服除權發遣南劍州鋤彊植
弱倒屣寒士賦徭以時人便安之時宣和八年也會中
原俶擾詔起諸路勤王之師南劍與福為唇齒邦福又
帥藩也一旦調發徒以犒勞小不如意羣卒嘯呼為亂
守臣朝廷近侍也死焉一路騷然使者睨不敢制加厚
其糗糧金繒苟欲趣之去境上爾公面折諸使者又移
書謂曰京師有急待勤王之兵至此甫受甲也而敢戕

其帥尚可責以援王室耶且此不除他郡效尤或響應滋煽亂爾使者忍視此耶不聽敵益張甚道南劔盛旂鼓金甲頓城下肆為惡語居人惴懼至欲挈老稚去之公先敵之來陰為戰守計蓋甚密邦人未之知也敵至幾月果分毫無所得則皆反虞公追襲之不敢進其徒使來告曰衆畏公威已相戒秋毫不犯福州者某長某營某卒共二十人願執之以示悔且乞假道僚屬欲勿許公曰非諸公所知也吾有備矣且脅從何罪衆果縛

致二十人者公會僚屬於溪上受之餘黨望公逡巡無
譁絕溪而北郡以帖然其後朝廷用公之請誅此二十
人者餘皆釋不問解印之日郡人既不忍去公又後太
守到郡纔三日丁內艱會建安兵變建於南劔亦鄰邦
也邦人又大恐相與謀曰前日福州之兵窺伺吾城郭
微莊使君吾屬無噍類矣今建亂而吾郡適無守將得
莊使君庶幾復活我衆乃列公前日城守狀告於部使者
乞留公使者交檄公不得已復視事又三月建安之寇

平即日去郡使者以功最聞於朝公曰職當爾耳邀功豈吾心耶南劔誦公至今焉權發遣處州處於浙東郡小而僻公至惇尚愷悌攘剔弊蠹時方大旱公至則雨民歌謠之亦且安公矣未數月主管台州崇道觀閔三年除權發遣撫州未行復請祠於是主崇道祠者三請凡八年遂致仕予璫為金壇令迎公之官以紹興十六年十二月己亥終於金壇之官舍享年七十有五累官自將仕郎凡十遷為左朝請大夫初室宜人張氏早卒

繼宜人石氏亦先公十三年卒六男子長則璫也右宣
教郎知鎮江府金壇縣事次琯前監潭州南嶽廟璵婺
州蘭溪縣主簿皆右迪功郎玠璋璠皆將仕郎四女長
歸承務郎蔣慶祖而卒次歸左奉議郎仲某次歸右從
政郎新淮東總領錢糧所准備差遣王直諒季尚幼孫
男女四人公天資高明出人遠甚初不為過中驚世之
行然其所蹈履人亦不能及也覃思經術議論多得世
儒之所未到晚年視聽不衰亦未嘗一日捨書不觀待

宗族姻黨禮稱其情不以勢利為厚薄踈戚與人交久而益親初不為世俗詡詡相說後亦無反眼而絕也唯於小人平居為不善者言之至切齒然以非意來卒含容銷去之不唯不怒而已端居深念不妄發一語士有質疑請益者言皆會理不為枝蔓斷斷乎如稻梁可以療饑也自南劒歸不出里閭者累年守處又不數月而歸奉祠之請至於三四異時流輩登禁近聲聞烜赫與親姻之勢力可以援公者不少公視之曾不一介意亦

不以相汲引望人視諸子曰自進於學則喜見色辭戒
家人婦女勿以家事毫髮擾其志訓諸子以行己立身
之要則曰某事古人所以為也可為某事古人不為也
不可為反復再三必諸子心受神聽而後已故諸子皆
知學問源流言行疊疊有家法出而仕者守官箴有廉
直稱云鄉飲酒禮行縣令以鄉人之意奉公為鄉老諸
子衣冠粲然侍側鄉人夸焉故竊觀公之出處平生而
益知至誠之道可恃而終身也公嘗自謂平日事親事

君居官臨民處鄉邑誨子弟與存心養性以事天者唯一誠字無他術也然公初不為表暴以求信於人以祈報於天也而其侍僖簡則為令子弟僖簡愛焉遊場屋則為材進士士子推焉在太學則為名師儒後學宗焉臨兩郡則為良太守郡邑安焉退而家居則為鄉先生為賢父兄人人愛重焉而康寧壽考以令德終有子有孫流慶未艾天之所以惠貺公者又如此誠之不可掩也於公豈不益信哉金壇與諸弟將以十七年三月乙

亥奉公之柩合葬於宜興君山鄉紫花塢石氏宜人之墓遵治命也則相與屬某泣且言曰先大夫窀穸有期唯行治不可不書請以屬子某再辭不能則再泣曰知先大夫莫如子詳某度不得辭亦泣曰知公詳則信莫如某於是狀公之世與官次躬行閭閻如右若銘鏡諸幽垂信後世則以竢立言之君子

墓誌

夫人陳氏墓銘

某年某月某甲子江都仲某始以某州某縣某鄉某原
葬其配陳氏者乃泣叙而銘之夫人先世居建業當五
季之亂徙毗陵後為毗陵人曾大父光榮故不仕大父
延祐與其昆弟勤力起家閨門輯睦間言不聞於外與
人約不踰時頃閭里信之雖潛晦未仕而東南稱陳氏
與世族巨室等勉其子弟業儒聞名士賢大夫厚禮幣
使其子弟從之游夫人皇考與猶子棠偕遊庠序課試
先諸生不幸年四十而沒夫人諱某字靜婉生三歲喪

其母夫人顧氏後八年皇考又即世哀慕終其身不哀
平居容止甚飭凡組繡女工之事有所業不盡其藝不
止事一歷耳輒記不忘事諸父如其皇考事諸母如其
母夫人諸父諸母亦愛之如已生待儕輩和而有禮未
嘗失辭色御婢妾不怒而嚴人人畏愛不敢侮亦不忍
欺年十八歸仲氏予時轉徙衣食故窶狹夫人素富家
為予條畫生業若久於予家者家公見之曰吾為有婦
矣予每行役夫人為治饘索甚具或未旦支枕呼婢子

丁寧口授數四已又起視之曰如是吾心始安焉既就
道締紮寒燠無失宜肴核脯醢隨所求輒具予遊道路
如歸家聞鄉閭婦有毀節者歎息再三曰獨無死乎後
每言之必為之蹙額不樂金人連犯淮甸謂予曰敵來
緩急不相救子奉吾舅行吾不足累子也誓守吾志踐
吾言爾某人為某氏婦撫前人之子異已子又歎息語
余曰為人母當如是邪恨馮君無出耳馮君蓋予初室
也夫人歸予之明年生一女喜且謂曰吾緣薄是女子

亦當藉浮屠法保持之名之如比丘尼云予後因夫人之意取浮屠語名之曰靈湛又明年生男子曰存誠生二十六月而夫人不起實紹興四年十月丙寅宗族無內外長少哭之皆過悲初夫人之姑適高氏無子既寡兄弟迎致之家自夫人之幼拊鞠必躬長又訓飭成就之夫人恩報之亦無不盡聞夫人之喪哀戚過甚為之不飮粥者累日曰奈何奪吾孝女平時雖他人亦以為慈母孝女非特姑姪也常與予為同年進士中乙科今為

衢州州學教授視夫人如同氣云夫人少孤多難嫁未
再歲年甫二十而終嗟乎世孰有如夫人者予念夫人
未嘗不惕然心悸泣然涕下而恍然若猶未隔世也非
銘何以泄予思銘曰所襲之長兮所佩之芳兮有女在
膝兒卧旁兮百年幾何掩晨光兮琅玕其音曷日忘兮
清芳不墜鏡銘章兮噫天與人勿壞勿傷夫人之藏兮

祭文

祭泰伯至德廟文

古者時乎旱澇即明神而禱焉禮也後世淫巫瞽史與
凡不經之說非但不足以格神休咎亦瀆威甚矣今吳
郡之人不謁於他祠而唯神之謁神亦慰民之望俯徇
其求起盈疇之木於垂成之日解連朝之雨於指顧之
間夫豈人力然哉可謂至德也已蕪辭薄奠姑見誠心
無得而稱尚何以報

祭社祈晴文

奉天子之命有民有社使里閭無愁嘆之聲者吏也司

上帝之澤時雨時暘使田萊無饑饉之傷者神也故或
雨暘之差率焉有禱則吏惟神之求念此社之重卒從
其欲則神惟吏之應今既足之雨賴神而霽垂成之稼
因霽而蘇民既蒙休吏亦寬責奉茲酒醴聊告誠心佑
我城郭無有內外

祭五龍文

升膚寸之雲不崇朝而雨天下非神龍之力也歟然民
之望乎雨也亦志於足而已姑蘇為郡帶江接湖一雨

滂沱四野瀰漫夏滂而禱無歲無之今多稼垂成復以
病告慰民之望雲霧旋披瞻彼甫田孰非神力上下霄
漢飛潛自如尚鑒民言時暘時雨

祭李尚書若水文

維建炎元年歲次丁未九月戊子朔二十日丁未江都
仲某謹以清酌之奠致祭於故兵部侍郎贈觀文殿學
士李公之靈嗚呼哀哉士有一善聞於鄉閭而能自殊
於流俗則雖萬世之下猶或誦之況乎當大事而忠亮

可觀臨生死而志氣不移使遐陬僻壤知中國之有臣
而天下之識與不識莫不感涕而嗟咨後世固將聞是
風而興起而某也幸此生之同時嗚呼哀哉甲辰之夏
始得公之姓名文字觀其吐辭抗論豪健瑰奇雍容正
道排斥他岐固已私自欣忭知夫去聖雖遠而斯文之
未衰及天子命公典教太學則又舉手而為多士賀知
後學之有師雖博聞彊識謂當模範於學者而偉材碩
德固宜登廊廟而為天子之倚毗乙巳之冬外寇猖獗

禍興邊陲上皇內禪而得聖子登崇元凱放黜窮奇有
志之士交口相賀謂宗社自是永固而彊寇可以鞭笞
丙午之秋公自儒官出使邊庭天下又知忠義之可仗
而狂童之易治奈何斯民寡祐而國勢至於中微赫赫
中國累聖重熙巍巍堯舜蹇蹇卑變蕞爾小邦再抵京
闕而堂堂百雉之城遽及夫顛危嗚呼痛哉敵人嗜利
無厭苟可以肆其彊暴者夫何懼而不為在廷之臣相
傾駭愕坐視依違者固何足道而或歸命異姓又自以

為權宜禮義廉耻之風掃地盡矣而遠方之視中國將有秦無人之疑非公叱悍悖而奪之氣視死如歸則夫萬世之下孰知中國有真主而時之不幸以及於斯公之歿矣明主嗣興天命未改斯民謳歌而樂推海內傾心以望太平者實指日以期首加卹典褒崇大節追榮秘殿而賻贈有加者蓋幸公之或知嗚呼哀哉公有尊主之心而位不及於公相公有濟時之志而福未及於黔黎炯炯忠烈諤諤端方而遽逢此百罹歿為明神以

遂剛毅敢為之氣以陰相我宋之中興者非公而誰今
歲之九月公之喪始至江都而某也竊伏淮瀕蓋嘗聞
風而瞻思惟盛德之事卓絕竒偉而顧自忘其駑蹇庶
十駕之可追百身莫贖徒有感於私心罔知涕淚之漣
漉式奉清酌寫哀以辭公其舉觴而鑒茲嗚呼哀哉尚
饗

欽定四庫全書

集部
浮山集卷五至七

詳校官庶吉士_臣柳邁祖

主事_臣呂雲棟覆勘

謄錄貢生_臣劉錫珪

謄錄監生_臣黃綸

欽定四庫全書

浮山集卷五

宋仲并撰

表

天申節賀表

千秋上唐宗之鑑誕節載臨萬年稱漢殿之觴忱誠並
奏歡均率土望極層霄恭惟皇帝陛下剛健法天聰明
冠古祖功宗德益增九廟之輝主聖臣賢相會一堂之
上鴻雁昔勤於還定鳬鷺今享於盈成無疆惟休有秩

斯祐臣祇膺恩綽叨奉守符聞道路之歡呼望闕庭而
頌祝卜年卜世遠踰周歷之期爲春爲秋俯陋莊椿之
算

賀皇太后還闕表

王化復行永輯重熙之緒天休允答聳觀長樂之還盛
事無前歡聲相告恭惟皇太后徽音是嗣懿德惟行早
開甲觀之祥基圖有永歸就東朝之養壽考無疆恭惟
皇帝陛下誠懋格天孝深愛日垂裳而治終承戲綵之

娛當饋永懷無俟含羹之獻方業業兢兢乎再造茲融
融洩洩之重歡聖德何加令聞不已臣叨榮滋久竊忝
爲深班列辟以稱觴阻趨漢殿均黎民而擊壤增想堯
天宗社之休乾坤何極

蘄州到任謝表

天陛深嚴已誤對揚之寵准邦安便更叨臨遣之華懼
不克勝凜無所措臣某中謝伏念臣材惟駑鈍分合羈
栖平生憂患之因仍晚歲塵埃之汨沒少習徒在固自

鄙其雕蟲壯志無成或共憐於畫虎雖世路三戰之皆
北而此心萬折之必東巢林不過一枝姑安素分伏櫪
志在千里未泯壯圖頃備數於有司獲盡言於常寧粗
陳時弊偶契宸衷華袞蒙一字之褒皂囊罄千慮之得
罪實多於擢髮豈易消除疵不待於吹毛曲蒙涵貸起
於祠館付以邊城于淮之濱素稱樂土遡江而上不隔
幾程荷恩實深指心圖報已涉近境即布上恩問所疾
苦如何且今閭里安否有欲糾合鄉社以備他盜者臣

則分之飲食諭以協心有能服勤耒耜以務農功者臣
則犒之酒漿勉其戮力告以天子既仁且聖於生靈務
在矜憐信哉斯民至愚而神聞臣言莫不鼓舞每事不
擾無令橫吏及其門有寃即言無使豪宗肆其暴要令
五縣常若一家使臣得竭其愚撫躬自知其幸此蓋伏
遇皇帝陛下仁如天地英紹祖宗一視四海之黎民寧
分於遠邇思得兩漢之循吏或求之賤微顧如愚臣上
辜聖世心非木石豈不知拔拭之深恩若邱山唯自誓

靡捐以報儻有一毫之補寧甘百謫其身感極涕零慙
深汗浹使愚使過實僥倖而得之于蕃于宣期黽勉以
稱此庶幾贖過無重速辜然臣視彼田疇稽之圖牒戶
以口計昔爲十有二萬今主客之數不過二萬是猶十
分之一田以頃計昔亦十有二萬今耕鑿之數僅踰三
千是爲百分之三市井之間居民未復郊野之外人跡
猶稀臣謹招集流離俾還故業銷除愁嘆俾樂聖時唯
節用可以豐財臣當鑄俸廩之大過唯清心可以省事

臣當戒宴飲之不時吹簫未及噬臍既往事有利於民而便於俗臣當夕以思而朝以行去國雖遙敬想天威之咫尺其治貴簡悉遵聖訓之丁寧誦堯之言服膺無斲

代謝郊祀加食邑三百戶表

歲禮對天曾豆邊之莫預疏恩加地尚簪履之弗遺詎獲懇辭肆聞威命中謝伏念臣壯心彫落多病侵陵歸故國之邱園稍休暮景奉真祠之香火仰酬大恩屬三

歲之親祠蒐多儀之久廢天地昭格祖宗宴娛望極園
丘想靈旂之來下恩沾衡宇仰睿澤之旁流久矣投閒
恍焉拜命雖附劇於鰲抃初莫效於駿奔方業茂少康
不失配天之舊顧功慙仲叔猥蒙與邑之多固避無從
祇承有覲此蓋伏遇皇帝陛下受天全付躋世大安孝
允格於神明誠克參於高厚卜年卜世符三代有道之
長饗帝饗親嘉四海以職來祭迎景貺於至日敷龐禧
於普天誕錫綸音增加井賦既欣逢於盛世又竊冒於

殊恩歌詩十九章莫述無前之蹟邑人三百戶終懷非
據之憂溝壑未填涓埃是效

代謝郊祀加恩表

薦奏上儀肅將宗祀猥被便蕃之寵曾微顯相之勞竊
以一精二純間三歲圜丘之祀九階五室參四阿重屋
之規斷于淵衷昭我烈考鬱精禋之交格紛戩穀之具
來顧何力焉有如臣者乃躡登於侯社仍增多於井田
此蓋伏遇皇帝陛下游舜巖廊美禹黻冕宅中圖大方

以四海爲家嚴父配天茂對三靈之貺舉國舊典加恩
具臣微效豆籩以均敷於神社遠思籌策當益贊於聖
謨

代辭免郊祀加恩表

均錫神釐誕揚制綽雖頒恩率土無遠弗霑而拜命自
天非宜爲懼伏念臣猥由凡瑣進冒寵榮曾何效於絲
毫徒自嗟於駕蹇海寓際千齡之運郊丘親三歲之祠
而臣竊食殊庭養疴近郡於穆清廟阻陪多士於駿奔

爰熙紫壇徒想千童之羅舞敦陪邑采眩曜衡茅等三
事大夫以疏榮豈四姓小侯之敢望殆措躬之無所顧
何力之有焉非不貪榮念無以稱伏望加憐誠悃亟寢
誤恩如微臣得邑已多況平時於國何補貳公峻秩久
懷負且乘之羞萬戶錫封當重器與名之假

代謝給事中表

代言罔功已玷綸闈之選疏恩踰分更叨瑣闥之除人
曰次遷臣慙虛授中謝竊以侍從之貴特異常僚封駁

之司與聞有政伏自比年而降率由西掖而升亦惟爾
位靖共不犯擅權之誚庶幾乃心啟沃無慙批教之風
伏念臣夙誤聖知洊塵華貴擢從載筆俾與贊書思若
湧泉莫想前聞之彷彿信如皦日願裨聖治之毫分念
衆賢和則萬物和方朝廷正而百官正典司獻納務協
寅恭災遽來於滿盈疾未瘳於瞋眩酬恩無地縈但懷
於晝歸錫命自天寵更叨於夕拜若爲仰稱彌懼疾顛
此蓋伏遇皇帝陛下孝格神明誠通高厚眷近侍清華

之地矜一介遲暮之蹤聖德無加已成洩洩融融之樂
臣力何有莫追灝灝噩噩之書方右省之冒居惟左遷
之乃稱刳疲曳阻趨于文石尚褒陞進列於黃扉避極
循牆懼乏回天之力感深銘骨彌傾就日之心臣敢不
尚厲壯圖仰銜洪造既曰有事於殿內豈容無益於縣
官久矣負薪滋殊恩之未替期於結草誓初志於弗移
代鎮江守臣到任謝表

帶漢沔之雙流初辭重鎮環江山之四面復玷名藩自

憐華髮之侵莫稱朱轡之寵非材之懼易地惟均中謝
伏念臣猥以凡庸起從疎遠事君不敢有已姑自竭於
駕疲居官無以踰人竟何裨於毫髮備煩使於數郡受
殊知於九重恩榮每溢於望初顛躓率由於寵過屬兩
淮兵戈之後起孤蹤草野之中初持帥鉞於淝水之濱
旋易守麾於浙江之右沿流而下坐席未溫懷綬甫來
豈微勞之敢憚彈章遽上駭公議之不容養痾俾便於
家居起廢存膺於郡寄方欣暮景觀德化於須臾更造

昕朝瞻威顏於咫尺凡曩者風波之騰沸荷昭然天日
之照臨聖訓丁寧愚衷感勵每懷赤壁嗟無補於上流
敢謂朱方乃再叨於近地視蔭有幾自顧衰殘棄甲復
來寧無訕笑此蓋伏遇皇帝陛下聰明冠古英斷自天
燭萬事之幾微憫羣元之疾苦緝熙政紀將與三代以
同風勤恤民編無俾一夫之失所遴擇循良之吏猥及
么麼之臣方人言悉疏其愆尤姑從薄罰賴天度深知
其愚慙復昇舊符臣敢不勉思今日之當爲深懲疇昔

之未至惟奉法可以責吏惟嗇用可以愛人擊楫渡江
莫遂有爲之志傾葵向日終酬未報之恩

代平江守臣到任謝表

卧十年之蓬華賜覲丹墀假十里之麾符升聯左棘宣
恩闔境拜命層霄中謝伏念臣猥以凡材叨塵臚仕際
千齡之運每誤沐於宸恩保百乘之家惟勉承於祖烈
實繁全度寢齒近班解重寄於玉麟尋勝緣於琳館念
望雲而就日徒切心馳荷包荒而匿瑕曲憐肺附比趨

朝宁仰戴宸恩顧惟麋鹿之姿久棲田野復綴鸛鷺之列
恍對軒墀首叨需宴之慈旋拜晉蕃之錫敢圖綸制更竊
輔藩惟茂苑長洲在三都素稱於重地而清香畫戟由有
唐悉用於名流頃兵火之洊更尚瘡痍之未復如臣僑寄之
久習熟其風當舟車之要衝亦冠蓋之淵藪農疇在望無復
佩犢而帶牛民俗相諳不待問羊而知馬夫何踰分乃爾冒
居此蓋伏遇皇帝陛下禮遇臣鄰仁霑黎庶增光祖廟已濟
業於中興軫念侯方尚擇

人而共理念臣侍清光之有素察臣資愚蠢而靡他縱
無赫赫之名猶謹恂恂之守特遷眷渥俾撫凋殘臣敢
不佩聖訓之丁寧法前人之愷悌夙宵鞭策圖報効於
萬分左右規繩謹遵承於三尺使斯民皆安於閭里乃
愚臣無負於邦家

代郡守到任謝表

持節觀風已誤轉輸之役剖符宣化遽臨浩穰之區荷
寵渥以優加顧名實之匪稱驚榮罔措固謝莫遑中謝

伏念臣狷直無庸迂疎有素聞詩聞禮徒佩過庭之言
爲箕爲裘已愧克家之義侵尋末路俯仰半生晚依日
月之光獲際風雲之會脫抱關擊柝之冗豈初心之敢
期專飛芻輓粟之權仰宸恩之過厚每念人言之可畏
常思自效以投閒夫何僥倖之深復預使令之數湖山
清遠本近臣撫鎮之邦宮闕深嚴當萬騎來臨之日重
以民繁而物阜豈堪力薄而效疎惟厚德可以鎮浮惟
偉才可以治劇顧茲兩者未有一焉徒就力以懷慙欲

辭難而莫可此蓋伏遇皇帝陛下聖明普照天度并容
整七萃而省方勵百僚而圖治謂臣馳驅已久庶幾粗
曉夫民情知臣愚戇無他或能致勤於國事就加委寄罔
間疎微臣敢不益究忱誠仰酬睿眷布寬大之澤當令
百姓之少安嚴發擿之科尚覲一方之無事

代淮郡守臣到任謝表

呻吟道路歸竊祿於外祠屏伏田廬起分符於近郡時
惟自省未獲所安祇役云初酬恩何有伏念臣技能謏

薄志念凋殘遺子一經已墜箕裘之緒及親三釜莫追
菽水之歡荷清朝簡記之不遺顧平生超踰之已甚奉
使亡狀抑常典而用輕閱日幾何先衆人而起廢所願
叱馭驅車而往敢辭捫參歷井之難亦既暑行不忘夙
駕僅踰月而爲杭葦之役未半塗而有負薪之憂義激
孤衷猶欲遡流而上恩霑九死遽令改轍而東親藥石
以全螻蟻之生續餽廩而紓糟糠之迫歸掃先臣之墓
自分終焉復綰郡守之章豈念及此迂踈奚稱微賤莫

辭封疆雖盡於淮壩井邑實連於江潁舟車所會囊括
六路之衝兵火未蘇今猶十室而五自以荷生聚撫摩
之澤晏然無愁痛歎息之聲臣獨何能唯知不擾此蓋
伏遇皇帝陛下日明旁燭天大并容謂共理實難於全
才乃兼收俯及於一介免於大譴大訶之域已戴隆寬
察其欲安欲逸之情本緣衰病稍加驅策示不棄捐使
之循分以知榮庶其悉心以知勉臣敢不欽奉恤民之
令益堅報國之心一日暴而十寒恐自荒於素志昔者

疾而今愈敢有愛於微軀當效涓埃仰酬雨露

欽定四庫全書

浮山集卷六

宋 仲并 撰

表

代謝賜御書石刻表

祥光下矚遙瞻雲漢之章寶刻肆頒頓改江山之觀超軼往古模範來今拜賜馳心開編溢目竊惟國家方太平之日治格彌文帝王當萬幾之閒書成肆筆魚躍龍騰之既遠煙霏雲卷之何觀斷簡殘編寢多湮沒舒牋

點翰舉之師承仰宸畫之一新掩前聞而盡廢與唐虞
三代而並駕方萬邦共惟帝臣陋鍾張二王之遺蹤乃
八體皆登神品此蓋伏遇皇帝陛下聖由天縱德懋日
新聲和氣和恭己巖廊之上心正筆正留神翰墨之間
細書遠邁於漢光大字羞稱夫宋武刻金石而垂久榮
日月以並明臣猥奉守符欣逢盛舉藏之泮水倍增儒
道之光輝副在名山當有神物之持護

代謝賜御書御製文宣王及七十二子贊表

像列羣英夙配春秋之祀贊揚遺範共歆旦暮之逢奉
奎畫以珍藏徧黌宮而忭躍中謝洪惟宣聖挺生魯邦
謂文王既沒文不在茲乎惟考父之生後將有達者麒
麟之於走獸出其類也距今千數百年螺贏之祝螟蛉
久則肖之偉茲七十二子傳之歷代奉以至誠立贊圖
形創自開元之制議名廣禮備存章聖之規至若高弟
之流止命近臣之述惟明主萬幾之餘暇非夫子六藝
而不觀嘉乃芬芳寵之華藻生也不遇徒相從陳蔡之間

沒有餘榮乃其際唐虞之盛恭惟皇帝陛下睦鄰偃武
稽古右文玉振金聲遠同符於將聖肩摩袂屬例光賁
其門人念曲阜石壁之久湮尚緇林杏壇之可想灑潤
幽潛之下濡毫蠖濩之中煥乎有文昭若揭日宮商述
奏恍如韶樂之聞琬琰一新復見河圖之出邈矣終古
起於九原臣竊守邦欣逢盛事謹百拜而登受聳萬目
以榮觀為章于天榮祥光之下矚未墜於地蔚聖道之
重興

代平江守謝賜府第表

詔移清蹕將臨江左之上游恩畀黃堂益壯吳中之都會湖山改觀井邑增輝竊惟泰伯之舊封尚想延陵之遺烈郊遂俯連於震澤川浸旁接於具區雄麗相夸臺豈遊於麋鹿風流未墜館或帶於虹蜺更興替於千年際盛明於今日惟明主龍飛而御極屬羣黎蟻附而傾心露蓋省方見車馬羽旄而咸喜宵衣圖治無池臺苑囿之是營驟拜絲綸寵還藩翰雕藥鏤淙顧何取傖父

之言畫戟清香乃遽踐詩人之勝此蓋伏遇皇帝陛下
天臨寰宇子惠臣工乃寢乃興行考周王之室克勤克
儉每卑夏后之宮慰闔境之謳吟憐守臣之僑寓撫躬
重拜循分載驚仰體宸眷之優隆因悟聖圖之廣大蓋
玉京未靖馬能鬱鬱而定居然圭竇苟安豈識潭潭之
若此云何報稱姑誓糜捐

代淮西守臣到任謝表

朱轡皂蓋之寵猥及非材息烽卧鼓之秋廓然無事叨

恩已甚尸祿為慙伏念臣家至寒微性尤固滯惓惓畎
畝每傾葵藿之心碌碌蓬蒿安知鴻鵠之志運逢千載
好結兩朝偃革橐弓一洗風塵之警攀鱗附翼猥容螻
蟻之微脫身刀筆之中厠跡簪纓之後佐六條於浙水
總五市於海陬備厯險難洊叨餽廩無功而食方感天
荷聖於窮簷不次之恩遽共理承流於名郡邊陲寧謐
訟牒簡疎四野豐登一家飽煖此蓋伏遇皇帝陛下增
光基緒總攬權綱察羣下之正邪示至公而黜陟帝堯

則天為大愚智並容文王視民如傷邇遐一體欲黎元
之不擾知慙直之無他加過分之恩榮使悉心於撫字
臣敢不深惟僥冒自力驚疲當令蕭條閭里之間咸蒙
廣大朝廷之澤江山雖遠日月何不照臨民社非輕塵
露或容補報

代南安軍守臣到任謝表

再昇民社祇荷宸恩首頒詔條申諭郡境初無已試之
效慙非共理之良伏念臣材學空疎性資椎魯早憑世

系濫綴官聯筆楚塵埃脫迹判司之冗簿書期會悉心
俗吏之為逢盛世之清明極微生之僥倖積勞吏考假
寵州麾雖云去國之遙正念於民為近干戈久戢藹聽
康衢之謠年穀屢登自絕鉅筭之訟如臣何有迺爾叨
居此蓋伏遇皇帝陛下孝格神明誠參高厚均一人有
慶之澤垂萬世無疆之休扶漢業以中興增輝九廟暢
堯仁而廣運加惠羣方天日所臨嶺嶠奚遠臣敢不誓
酬洪造勉竭駑材郡以南名敢有適南溟之望星猶北

拱豈忘馳北闕之心

代建康守謝降詔不允再乞致仕表

餘生垂盡瀝危懇而叩闕審眷深隆渙殊恩而出綈俞
音尚閼賤分奚安中謝伏念臣涉世多艱賦資極陋甘
從州縣塵勞之役誤登侍從獻納之班居然樗櫟庸材
豈堪收用已矣桑榆暮景更迫衰殘承乏帥藩典司宮
鑰謂當一面長江之守庶寬九重側席之憂豈期疾疢
相仍筋骸頓憊縱未歸於鬼錄寧無慊於官箴疊上囊

封期遂掛冠之請存頒綸詔尚憐墜履之餘伏讀再三
撫存曲折激懦衷而增感起衰病以知榮此盖伏遇皇
帝陛下大度並容至仁善貸赦其仰干旒宸屢陳告老
之言謂其尚玷藩維責以承流之效特紆一札增耀十
連而臣上負恩私惟知感涕念災咎之若此顧喘息之
僅存卧而治之雖寵寄之彌重耄無能也矧疲瘵之益
加尚期從欲之仁俾遂投閒之分

代謝給假還鄉表

戀闕丹心欣奉便朝之對首邱素願獲為故里之歸加
憐措枕之餘未使抽簪而去曾無近比積有深慙伏念
駑蹇之資垂老彌鈍斗筭之量既滿必傾惟置散投閒
乃分之宜而陳力就列不能者止徒叨寵祿良切厚顏
敢懷金馬之昔游尚玷玉麟之重寄筋骸可強雖夙夜
盡瘁而豈辭疾病遽侵自冬春露章而繼請俞音尚闕
召節旋頒初侍昕朝願効美芹之獻僅踰信宿頓劇負
薪之憂益思納祿以弭災亟荷疏恩而予告此蓋伏遇

皇帝陛下日明旁燭天大兼容原愚蠢之本心借寵光
於末路荷眷慈之深切惟疾之憂勤詔旨之丁寧何恙
不已俾親藥石少憩邱樊臣敢不仰銜異恩退省微分
既餘齡之晚晚復舊學之荒蕪侍講華光終恐莫裨於
萬一掛冠神武尚期得可於再三

代辭免轉官表

升文秩之兩階首頒異數滙愚衷於九陛未賜俞音敢
薦瀆於天威冀曲從於人欲伏念臣羈孤賤分叨竊踰

涯荷太上皇之眷知亟升近列仰明天子之臨御獲侍
清光慶澤汪洋盛典稀濶千載一遇身獲附於風雲萬
歲三呼心益傾於葵藿幸實多矣功何有焉輒布懇辭
重勤詔諭此蓋伏遇皇帝陛下重明麗正懋德建中不
惜恩加於左右之臣實欲賞行無內外之間然臣滿盈
已甚理必致於疾顛勞效未聞義尤慙於虛授祈乾剛
之獨斷回渙號於既行庶叶僉言以安微分

代服闋欲赴朝見表

風木摧心偶遑須臾之死雲天矯首行瞻咫尺之威稍
還去幹之魂旋下感恩之涕中謝伏念臣器資凡陋世
緒單微圭竇簞門偶蚤緣于戚畹彈冠結綬獲僥倖于
仕塗佐麾符于兩州總貨泉于一道叨榮過甚報國未
遑器小而傾禍延所恃扶匱遠從于海嶠荼毒何堪賜
金來自於天閭葵傾彌切堊室方嗟于駒隙丹墀敢望
于鵷行此蓋伏遇皇帝陛下大德包荒深仁恤隱孝廣
薰風之奏恩如湛露之施興憐行路之長川浮陸走加

厚匪頌之式生榮死哀致此餘齡偶全今日仰惟篤近
舉遠不忘螻蟻之微誓當以孝為忠永竭犬馬之力

代郡守謝傳宣表

澤國承流未著蕃宣之效星軺傳命洊頒溫厚之辭仰
宸眷之具存激懦衷而增悸伏念臣材乖任重識匪通
方荷黼黻之誤知入塵二府叨朱轡之重寄出殿三州
志大徒勞性疎自與毫髮未聞于補報私忱寧免于怨
尤懷故國而就閒屢伸危懇假便藩而承乏姑竭駑材

周旋郡舍之幾時絡繹使車之及境溫言甚寵重拜知
榮此蓋伏遇皇帝陛下天大無容日明旁燭憐簪履之
舊物久玷寵光錄屏翰之微勞曲加體貌臣敢不誓堅
晚節益勵壯圖雖撫字為勞未有及民之善政而眷私
若此敢忘致主之初心

代建康守臣除在京宮觀侍讀謝表

守符留鑰方退謝於不能祠館經帷迺進叨於非據是
謂辭榮而益寵屬茲抱疾之有加渙汗莫回震驚罔措

伏念臣桑榆迫暮蒲柳先秋幼所學而壯行愚無可紀
老將至而耄及疾弗能支尚塵秘殿之隆名久玷別都
之重寄長江一面恍驚歲月之遷丹陛九重夔隔雲霄
之上比膺節召靡俟駕行素願畢陳幸須臾之無死清
光在望實咫尺之不違已殫區區控避之詞復拜疊疊
便蕃之數恩浸淪於骨髓憂頓迫於膏肓縱欲貪榮若
為報效此蓋伏遇皇帝陛下聰明稽古恭儉御邦清淨
為心法道家之日損緝熙為學過周頌之月將特寵微

臣俾留近署臣仰念鴻恩之難報俯憐餘日之無多過
竊思輝自貽顛仆狗馬幾填於溝壑嗟就日之無期麋
鹿終戀於山林更籲天而有請

代建康守進職真除謝表

分陪都之重寄引分奚堪疏秘殿之隆名叨榮益甚詔
音深切感涕縱橫中謝伏念臣一介賤微半生流落偶
際風雲之會起泥塗而望清光誓輸犬馬之勞效涓埃
而答殊寵曾無瑣善徒索太倉比自吳門趣還省戶乘

與既駕將陪羈紲之行帥聞偶虛驟當筦鑰之守攝官
未幾失職為多敢期鳳詔之頒真畀麟符之寄躋書殿
高華之選極儒冠遭遇之榮私自揣於非宜恍莫知其
所措此蓋伏遇皇帝陛下聖圖廣大天德清明循名責
實而勵百工撥亂興衰以康四海無可無不可一恢覆
燾之仁有能有不能兩遂賢愚之分如臣孱瑣未忍棄
捐雖云疲瘵之餘猶在使令之數第恨壯心之牢落難
酬訓語之丁寧臣敢不黽勉致身馳驅從事嚴徽衛於

宮闕消瘡痍於里閭事君當無擇而安彌堅素志陳力而弗能者止嗣貢危衷

代謝落職表

罪玷風聞宜置身於憲網恩隆天覆止削籍於禁塗久嗟窮谷之抱疴逖想重闈而拜命少寬溝壑莫跂雲霄中謝伏念臣樗櫟材凡斗筭器淺垂髫受業迨五十而無聞結綬登朝宣萬分之有補頃叨持於從橐即退奉於藩符屈指去國者七年叨恩奉祠者三任病無起日

痛欲呼天尚容索米於太倉久念掛冠於神武果勤彈
疏上徹遂疏出處語默之乖違有閭巷所羞稱者衣服
飲食之纖悉雖閭閻人必知之事始傳聞臣猶駭愕殆
厝躬之無所纔褫職之為輕此蓋伏遇皇帝陛下御衆
以寬臨下有赫方循名責實之日顧欺世者法豈勝誅
惟赦過宥罪之時雖負譴者罰皆從省謂臣流落之寢
久憐臣災釁之彌深姑斥清班尚寬嚴譴重念臣生其
餘幾目已不明既屏跡以絕游亦冥心而委化不再得

者犬馬既愆之力甚難忘者乾坤未報之恩往矣何追
莫展糜捐之效僉曰不可更蒙含貸之私寵施甚宏省
循益懼臣敢不誦訓辭之深厚諗德意之寬慈息意外
緣專心內訟飯蔬奚念幸已踰於再生結草可為誼不
忘於九死

--	--	--	--	--	--	--	--

欽定四庫全書

浮山集卷七

宋 仲并 撰

啓

賀正啓

考圖數貢朝廷蒐講於上儀獻歲發春神物扶持於盛
德宜多祥祉來相與居恭惟某官雅量鎮浮高風激濁
文行追於前哲譽滿簪纓德業富於當時眷深旒扆鬱
然介福集此休辰輶車異時藹威名於南國玉堂指日

對寵渥於東風某猥託恩麻阻趨賓廡願乘交泰之會
賢業川流永膺難老之期神禧日茂

賀冬啓

律本吹灰驗微陽之初應天元啓厯嘉品彙之潛萌惟
國宗工膺時純嘏恭惟某官忠貫金石誠格乾坤撥亂
支傾勒休功於燬鼎持盈保泰荷深眷於冕旒亘古所
傳於今為盛歡聲四海欣逢來復之佳辰眉壽千秋茂
對駢臻之多祉某竊食於外戴德方深令序載臨捧觴

阻陪於下列崇墉在望飄蓬永賴於餘休

賀執政啓

光奉制綸登持政柄進正臣治之表公議所歸得君子
邦之基羣情共慶初聞告命四起歡謠矧得預於登門
顧曷勝於賀厦竊惟王者體元居正允資廟堂左右之
良大臣以道事君當得搢紳中外之望粵自厲精有為
之日肆求執德不二之臣特風動於四方亦日新於萬
物折遐衝於樽俎銷邊陲未然之憂贊獨化於陶鈞固

宗社無疆之業四方傾屬九陞疇咨蓋將熙帝載而亮
天工所賴謀王體而斷國論成湯勇智若伊尹則見而
知之帝舜聰明舉皋陶不仁者遠矣恭惟其官高明博
大直諒端方領袖士林早擅類雍之令譽淵源學海獨
傳鄒魯之遺風傾三峽之詞源高衡陽之紙價踐揚華
貫坐振頽波直筆正繩屏豺狼於當道危言譴論鳴鸞
鳳於朝陽居江湖之濱而義不忘君處雷霆之下而心
惟許國孤忠莫助正色自持列簪橐者幾時領麾符於

數郡柱石本朝而安危獨任權衡多士而邪正坐分雅
推當世之宗工灼見前哲之大體自結今天子之眷亟
升少常伯之聯確乎金石之言每贊邦家之大計炳若
著龜之見預懷邊鄙之深憂宜輔冕旒進參鼎鉉果膺
柄用仰副簡知庶因名實之俱享益建功名於不朽可
久之德可大之業用光輝於禁塗適求厥寧適觀厥成
永贊襄於帝宸舉世所望非某敢私俯惟么麼之微蹤
自念蹉跎於壯歲夫子之牆數仞已幸頻登烏獲之力

千鈞猥蒙借重不假螭木先容之助遽叨華袞一字之
褒榮耀晚生歆艷同輩逮茲顯拜倍劇懼悚三吐哺三
握髮之風固共高於相閥一投足一舉手之力茲有望
於恩闕欣幸之深敷陳罔既

賀樞密啓

被中宸之眷峻右府之班妙簡清衷增重本兵之寄允
符輿望聳聞闢國之謀伏惟某官興學窮微懿文行遠
振英聲於烏府擅大手於鑾坡嘉猷嘉謀睿聽每勤於

日昃危言危行孤忠自表於歲寒挺絕俗之高標富經
邦之妙畧蚤登四近協濟萬幾扶天步之艱難上方眷
倚贊聖圖之廣大民所具瞻亟上封囊歸從里社卷舒
自我甫均琳館之間勲業在人已趣鋒車之召經幄暫
資於啓沃樞庭尤賴於贊襄向見管夷吾顧何憂於江
左獨憚汲長孺將坐折於淮南慷慨匪躬從容造膝妙
矣經綸之策長茲宥密之司某久藉餘輝頃陪末論起
舞欣聞於綸綍進趨阻望於門闌前席運籌策殊勲於

卷七
彞鼎明廷渙號頌好語於雲霄

賀直院閣學士啓

升華延閣視草禁林宗子維城方賴琢磨之助王言如
綽更資潤色之工斯道光輝諸儒歆艷恭惟某官宏達
大雅直諒多聞彌高彌堅夫子之立卓爾至剛至大益
軻之氣浩然名早著於膠庠言屢陳於丹陛頃辭畫省
游闕朱轡民惟卧轍之留士念賜環之晚領袖圖書之
府無易老成翺翔侍從之班寧容久次宸心彌注輿誦

交歸春秋禮樂而冬夏詩書益贊宗藩之善日月論思
而朝夕獻納每輸帝宸之忠仁人之言利博哉先生之
業謂勤矣惟九重孝弟之至無所不通賴一時播告之
修不匿厥指仍經帷之勸講司翰苑之除書詔其見王
者之心辭以鼓天下之動商盤周誥與之同風悍卒武
夫至於流涕捨公孰可舉世所推矧惟直學士之密侍
清光非若見大夫之備更煩使茲為華選本以優賢地
禁職親豈但詞林之寵天工人代即看政柄之持慶頌

惟均壯猷方懋其久處幘幘之下親承謦欬之餘察肺腑之無他荷齒牙之曲借途窮易感德厚難酬喜竊效於彈冠望非敢過貧甚宜於擊柝惠儻有終懇懇重陳兢兢良切

賀叅政啓

肅奉制音寵登政路凜然風采聳遐邇之觀瞻大矣謀謨整乾坤於談笑上方注意士率慰心恭惟某官庠序真儒朝廷元老淵源學海獨追鄒魯之遺風領袖士林

早擅江淮之雋望踐揚華貫坐振頽波墨綬銅章屏豺
狼於當路青蒲白簡鳴鸞鳳於朝陽居江湖之遠而義
不忘君處雷霆之下而心惟許國孤忠莫助直道不容
登禁塗者幾時更左符於數郡柱石本朝而安危自任
權衡多士而邪正坐分毀譽何心水爭而鬚眉可燭險
夷無玷歲寒而松柏後凋獨推當世之宗工灼見前哲
之大體比分閫寄尚鬱巖瞻宜鼎席之登延果鋒車之趣
召冕旒虛竚方疏三接之榮綸綍游頌即贊萬幾之重

每念累朝之極治驟惟今日之多艱嘗膽枕戈久勤淵
慮救焚拯溺所賴遠謀必求雅望之在人庶使餘波之
及物矧封疆廣袤踰千萬里而祖宗積累垂二百年兵
戈尚阻於關河烽燧相望於郊甸衣冠淪落介冑創殘
雖警蹕所臨天步稍安於吳會而氛祲未殄王靈久隔
於咸京方使擅絡繹而來宜廟算躊躇而定蓋圖一時
之安者或貽累世之患而慰在天之靈者當因率土之
心凡知愛君孰不慮此逮者英之既用想籌策之無遺

中外傳聞老稚慶躍某賦資極陋謀道弗勤已闕壯齡
自慚素志簞門圭竇久甘寂寞之濱卑蓋朱轡昔處幘
幪之下嗟莫窺於墻仞幸每造於坐隅聞德人憂時之
言得賢者事君之法屢蒙警策退必書紳兩歲於茲屬
訟愆於田野千里而遠空懷戀於門闌每慚馳問之疎
欣覩除書之下危蹤知免聊自樂於衡茅偉業可量當
大書於彞鼎寒威凝沍歲律崢嶸冀精寢餽之調仰副
鈞衡之託

賀張叅政啓

頌寵命於中宸輟真儒於近侍金華勸講暫辭經幄之
遊皐蓋行春聊借侯藩之重凡茲闔境指日俟公恭惟
某官高名聳於士林興學優於聖域長編大軸散珠玉
於人間直道忠言感風雲於帝所周旋禁路更踐政扉
贊獨化於巖廊夙被冕旒之眷揚仁風於海嶠共傳襦
袴之謠輶封入覲於丹墀麻制想聞於渙號藹然輿誦
童稚亦知其姓名尚鬱巖瞻父老幾為之嘆息從容五

學左右六經嘉謀嘉猷睿聽每勤於日是危言危行孤
忠自表於歲寒囊封屢聞綸音誕布雖謂三吳之重敢
勤五馬之來滿耳歌謠提封鼓舞五更清壯歡傳鞀鼓
之音萬井光華喜動湖山之色已聞引道行遂趨隅某
管豹淺聞醢雞後學飄蓬末路曾未許於登龍引領清
風顧豈忘於附驥每念未陪於色笑幾思自致於門墻
頃寄足於江濱嘗聞名於棣萼儒宮何有蕭條荆棘之
場戎事未休牢落弦歌之地敢歎廣文之官冷共嗟夫

子之道窮伏其几而襲其裳莫追餘韻護吾車而拭吾履未際斯時方注想於旌麾會一新於耳目雖東山之起謝傳寧久於茲而泮水之誦僖公自今以始與茲多士實倍歡悰

賀給事啓

祇奉綸言榮登瑣闥進正臣治之表睿眷彌隆得君子邦之基輿情共慶恭惟某官性鍾至粹學造純仁文藝九流探其源而守之以約詩書萬卷折諸聖而尊其所

聞蔚為庠序之表儀偉矣搢紳之領袖三朝舊德一代
儒宗流落累年顧卷舒之在我翱翔要路亦用舍之隨
時道至大而罔容名以久而自著天心遐想於故臣詞
省式還於舊物攀鱗附翼矧惟商宗共學之臣當軸秉
鈞行贊周室中興之運假道東臺之要陞班黃閣之榮
獻納論思正賴回天之力彌縫輔贊共看闢國之謀某
猥以疎庸誤蒙盼睐道路初聞於成命鼓舞實倍於常
倫悵白屋之棲遲空負昂霄之念望黃扉之清切良勤

賀厦之心諒惟啓沃之盡忠莫匪經綸之至計輒陳狂
斐仰瀆高明竊謂朝廷今日之深憂無若邊界累年之
大患兩宮安否之問未及於中原九廟奠獻之儀莫稱
於常典一人虛已而願治四方延頸以傾心汴梁淮泗
之郊蕩為榛棘荆楚湖湘之地尚厭干戈以二浙閩廣
瘡痍之餘奉萬乘鑾輿經常之費兵彊自肆民弱可哀
念詩人之美周宣以勞來還定為本而史臣之重漢帝
以名實賞罰為先若區區於簿書期會之間蓋碌碌非

社稷安危之計私憂及此公議同之莫若盡行平昔之言式副贊書之意庶幾大慰斯民之望用宏批敕之風

賀除給事中啓

伏審命傳中禁光臨玉筍之班職峻東臺寵冠金闥之彥搢紳聳望朝野增榮恭惟給事德守宮庭行敦坊表學造聖人之閫域言為君子之樞機優游四德之科卓犖九經之庫高文大冊散珠玉於人間直道危言聳風標於當世振頽綱於烏府秉史筆於螭坳多士以之心

傾羣邪為之膽落徊翔中外忠嘉自結於主知淹厯歲
時聞望益高於羣聽比膺鳳詔入覲楓宸爰進貳於春
官亟參華於法從親承帝簡寵拜夕郎密勿於丹墀必
有論事回天之力從容於瑣闥將見還詔批敕之風庶
幾允當於人心指日進登於柄用某久茲流落夙在知
憐萍梗微蹤固已疲於奔走門闌舊物茲有望於陶鎔
瞻頌為深依歸良切

賀建康王帥啓

上睦陪都疇咨近列中頒寵數申命名儒想問里望公
之來庶江山因人而重伏惟某官猷為遠大宇量深闊
兼洙泗之四科表儀當代謹春秋之一字題品諸生烏衣
遠紹於故家鶴髦更高於餘韻卓然雋問揚於要途帝
指親承謀與聞於宥密宰司分贊譽獨著於彌綸進貳
天官益隆人望襜衣揖左右手高映駕行束帶與賓客
言屢持虎節雍容禁闥密邇政扉藹太白之流風頻賜
金鑾之召用東坡之故事暫均玉局之間行北闕之詔

還先南州之委寄未幾歡謠之四起自應畫諾之多餘
枕籍詩書散英華於翰墨歎歌風月寓談笑於杯觴紀
明德遠矣之碑當庶事康哉之日大邦維屏真無負於
分符十國為連乃燕司於留籥咸知大用之漸非惟共
理之求方攀餞之傾城已歡迎之接境春風輦鼓散鐵
甃之離聲曉日旌麾動金陵之喜色惟是甘棠之遺愛
忍看行李之戒途舉皆祝公長無忘我某奔馳道路睽
遠門牆飢寒驅之形神瘁矣伶俜顧影連興舐犢之悲

飄蕩浮家自阻登龍之願荷矜憐之有日知愚戇之無
他興憐於垂困之餘受恩於不報之地賀深燕雀望極
雲霄僥倖窮途藉餘輝於油幕寅緣他日陪後乘於沙
堤

賀荆南方帥啓

伏審欽承明命作鎮雄藩宿望所臨輿情胥慶恭惟某
官宏才經世敏識絕人從容於肯綮之間頽悟於眇綿
之義備嘗夷險挺忠節之堅明協濟艱難藹事功之顯

白宜膺圖任以究遠猷甫報賜環之歸復膺推轂之遣
方叔元老家聲具存荊州上流閫寄尤重勞徠不怠既
藉於拊綏儆戒無虞益嚴於守禦惠此南國乞其外墉
式過其歸可拱而俟某趨承惟舊垂照特隆一去門墻
洊更歲籥封疆繡錯幸密被於沾濡郵置纒連庶數承
於動息其為欣抃實倍等夷

賀章尚書知平江府啓

錫寵命於重閭易左符於會府恩新雨露一麾尚寄於

朱轡喜動湖山萬井竚瞻於畫戟若民與吏式舞且歌
恭惟某官德宇廉深器資肅括淵源與學追還鄒魯之
儒風磊落宏才緣飾龔黃之吏事飛英聲於宇宙充浩
氣於乾坤獨賴何蕃凜凜忠言之猶在可輩蘇武堂堂
大節之莫回翱翔要塗羽儀從衆言皆底績知無不為
密侍冕旒造膝屢陳於妙畫出分符竹下車首振於清
芬幾年弊事之一新千里疲民之相樂中外聳聞於治
最東南就畀於雄藩慨念蘇臺舊稱樂土清香久虛於

燕寢無復曩時好音不及於泮宮尤甚今日欣聞渙渥
頓有光輝騰竹馬之歡聲起青衿之喜色蓋里閭疲瘵
豐年不飽於糟糠而庠序荒蕪多士半依於城闕訟牒
紛若儲峙蕭然在我公一舉手之間顧斯民方企踵而
待其性資至陋學殖未優頃被命而造朝嘗登門而望
履飄蓬末路竊食踰年敢期么麼之蹤獲處忻懽之下
六月徂暑尚煩夙駕於修塗南風其薰想對休祥於令
序

賀郡守除次對啓

還西清次對之班奉南國承流之寄雖分符便郡未直
承明之廬然持橐要塗漸近長安之日雲霄傳命道路
均歡恭惟某官材秀儒林譽傾朝宇起斯文於日月充
浩氣於乾坤聞詩禮於過庭鄙歆向異同之論告謀猷
於造膝高嚴徐侍從之聲載筆螭坳代言鳳掖草創潤
色豈惟粉飾於皇猷獻納論思共喜扶持於國論直道
不愠於三已抗章自請於一麾以金馬玉堂之鉅儒領

皂蓋朱轡之重寄融趙哀之冬日提封共藉於恩輝凜
湘浦之秋風有識皆為之嘆息茲暫還於梓里行入對
於楓宸某素荷知憐拱聞寵命與頌交慶已看吾道之
生輝匏繫何慚尚賴餘波之借潤鈴齋多暇澤國早寒
願為清望以自持當有多祥之來介

賀新知平江府李侍郎啓

頌寵命於丹墀起名儒於琳館漸近長安之日帝眷彌
深獲瞻刺史之天民情共慶恭惟某官氣充剛大道極

高明領袖儒林聲早馳於雖泮羽儀近列忠自結於冕
旒入告辰猷洊膺晝接由宰士彌綸之地登貳卿清切
之班操履冰霜凜前輩險夷之節議論金石究生民利
病之源言切當時效見他日正繩直筆宜哉冠烏府之
中大冊高文合視草玉堂之上奉身而退得譽彌休吾
君吾相之深知久應柄用若士若民之屬望倚俟詔還
茲析左符來臨巨屏惟茂苑股肱之郡望重一時亦秣
陵唇齒之邦近纔數舍實中外為之贊喜知朝廷所以

優賢某頃承謦欬之餘猥接茵馮之末荷知有日泥塗
自隔於雲霄踵謁無從萍梗尚淹於道路歎三年之吳
會限一水於淮山聞大纛之戒塗語提封而增氣香凝
燕寢往者多用於詞人名覆金甌行矣入陪於政路

賀湖州張吏部啓

上使節於七閩昇守符於四水瞻懷惟舊頻頌雨露之
恩寵命載新煥發湖山之秀公來何暮民睹爭先恭惟
某官雅量淵渟高標傑立追前人之軌躅綽見典刑覽

載籍之英華散為詞藻古今蘊藉進退雍容鴈序並遊
榮餘歡於四老鵷行暫隔注深眷於九重綸綍載颺旆
旌旋返趣近長安之日少慰輿言來分刺史之天增嚴
輔郡念苔雪之千里脫兵革於累年華屋填城白蘋遶
郭清風明月存舊觀於平時泛宅浮家想勝遊於千載
茲惟便地正以優賢聞千騎之亟來浹四封而咸慶郡
號無事更逢漢家共理之良歲當屢登咸頌張君為政
之樂某託恩門之滋久賴德蔭之非遥庶免譴尤敢云

裨贊驂駟開道豈容十駕之追鴈鶴巢林永遂一枝之
樂

賀權府李都運啓

備末屬於是邦相望一水託微蹤於所部久仰二天共
傳好語於雲霄更借餘輝於郡邑凡茲闔境指日竢公
恭惟某官識造淵微氣充剛大秋霜烈日童稚亦畏其
威名北斗泰山士子想聞於風采周旋金馬啓沃丹墀
親蒙黃屋之知久繫蒼生之望分符要郡惠愛追循吏

之風持橐禁塗獻納得侍臣之體茲持使節重謁帝閭
雍容造膝之言慷慨平戎之畧碩吳門之望久著而刺
史之座方虛孰慰民瞻聊倚君重五更清壯歡傳鞀鼓之音
萬井光輝喜動湖山之色已聞引道良切慰心顧茲淮
海之寒生亦玷簪纓之下列儒官何有蕭然荆棘之餘
戎事未休無復絃歌之舊上方前席而論道士將鼓篋
而樂羣我武惟揚斯文未喪雖東山之起謝傳寧久於
茲而泮水之頌僖公不云無望與茲多士實倍歡悰

賀越帥張叅政到任啓

榮膺寵渥丕著嘉猷雨露載新暫偃股肱之郡江山改
觀已聞襦袴之謠伏惟某官朝宁表儀搢紳領袖高文
華國詞章追三代之風偉論經時諫諍得七臣之體旋
登政路密贊君謨忠良於以彙征姦邪為之屏息有謀
猷則必告成王方仰於君陳非仁義則不言齊君獨推
於孟子將登庸於宰路遽就免於茲宮晉室之望謝安
何止成功於江左漢帝之尊汲黯猶煩卧治於淮陽

坐令駐蹕之舊邦復見巖廊之元老民歌且舞豈特無
愁恨歎息之聲事簡以熙又將布勞來還定之政諒無
淹於旬月行入秉於鈞衡某荷德惟深登門最舊久依
餘潤更竊鄰封剖符之寄可堪惟自虞於顛覆伐柯之
則不遠姑少勵於駑駘

賀郡守到任啓

初還使節就畀使符粲閩嶠之繡衣一方蒙潤森蘭陵
之畫戟千里慰心凡在帡幪尤深抃躍恭惟某官罷資

宏毅德宇靚深學妙詞源早擅搢紳之譽材優治劇寢
高朝著之聲無施不宜所至可紀登朝攬轡不吐剛而
茹柔宣化承流每抑強而扶弱載塗歡頰當宁眷懷增
秩賜金已錫潁州之懋賞鳴珂曳履宜列甘泉之近班
嗣續家聲益符人望茲鎮臨於輔郡實拱衛於行都舉
扇揚黎庶之風及茲惟夏持橐奉清閒之列諒不崇朝某
場屋寒生塵埃末吏頃備貲於漳水嘗託廕於棣華茲
幸會之非常且趨承之不遠爰深燕賀倍切葵傾

宮祠書考謝宰相啓

積愆不赦遽叨望外之恩賦祿無功亦上歲終之考未
填溝壑盡出陶鎔伏念某品極凡庸家至寒素少而挾
策莫窺門戶於六經長矣飄蓬偶綴姓名於一第起於
農畝恍若仕途執求富之鞭本非素志擊為貧之柝自
斷此生叨黷宇之初除荷化鈞之極力星辰燦夜借光
耀於迷塗草木逢春漸萌芽於生意甫雲天之在望遽
風木之纏悲俾為良臣母俾為忠顧何追於往躅願為

人兄不願為弟又永已於親歡過死惟宜義生何益荷
始終無窮之賜起老稚垂困之中力疾造朝望鈞閔甫
一再至疏恩佐郡瞻行闕纔咫尺間從容雲水之鄉滿
足稻粱之願苦無公事索太倉之米者垂二年僻諳民
情攝刺史之符者累數月當朝廷之極治幸閭里之相
安噬臍何追曾杯觴流行之弗戒舉手更賀乃雨露沾
濡之無窮煩言沸騰旁觀股栗縱魑魅之未禦豈蓬華
之敢安生之成之盡矣至矣矛頭漸米已安蹤跡之陷

危饜下得桐尚惜朽材之委棄稍還故秩即渙新恩予
以糗糧寬其饘粥雖田園有秋之歲素乏有秋倉廩之
登當中外無事之時更享無事祠庭之祿自我庇覆不
汝瑕疵家室妻孥共喜賴公而一飽天地父母不能與
人以再生此蓋伏遇某官造命寰區肩心宗社格天一
德昭垂傑閣之章凌煙元功煥發瀛洲之像生光簡冊
增峻陞廉惟堯舜之道陳於前故唐虞之際斯為盛並
注冕旒之眷與為保而旦為師相承袞繡之華周拜前

而魯拜後神明所相醫祝何工奚止八葉蕭氏之門真
得千歲僖公之壽長令海寓黃童白叟之蒙休坐見雲
初紫綬金章之侍側如某不佞撫已有慙滿一年之疾
痛呻吟免數口之飢寒憔悴賤固分也安之奚言貧誰
使之牢不可避已矣結綬登王畿之望罪籍猶存懷哉
索飯啼蕭牆之聲生意殆盡儻使浮沉於州縣或能黽
勉於簿書不狩不獵胡瞻爾庭敢冀三百困三百廬之
富無衣無褐何以卒歲已迫一之日二之日之寒雖犬

馬之力甚憊何施惟蛇雀之心中藏無已

謝樞密啓

伏遇某官忠貫天淵心存宗社積精深自得之學而持
之無倦負剛毅敢為之氣而守以至謙謂置安則安置
危則危常自任天下之重故可仕則仕可止則止每無
慚往聖之風直道靡容高標孤映受知明主飛聲本朝
批敕瑣闥動悉關於國體侍經遂幄言皆契於上心竚
看黃閣之登先正紫樞之拜豈止三軍五兵之運蓋為

同心一德之求江夏無雙素仰文聲之茂潁川第一更
看相業之優借高論以嘘枯憫窮途而推轂有如孱陋
亦不棄捐某每念饘粥之憂常妨文字之樂茲喜簡書
之暇日庶無飢餓之苦心因得魚而忘筌悟獲麟之絕
筆回念勞生之萬狀尚何營哉粗得卒業於二書可無
恨矣某敢不誓遵三尺圖報萬分蚤夜以思會計必當
耕當問奴織當問婢益詢利害之詳早則資舟水則資
車更究低昂之理儻粗了於官事是不忘於故書庶答

深知亦酬素志

謝監務楊秀才啓

文場類較與觀揆藻之工
版籍聯升私喜得人之盛
恭以解元先輩嶄然邦彥
卓爾舉髦問學淵源明夫
子忠恕之旨議論慷慨有
賈生通達之才嘗目擊於
雄文已心降於大手惟衆人
之甲可乙否不能齊議者之
異同則一時之虛後王前曷
足為大賢之加損方深自訟
遽辱移書辭采粲然謙冲過
甚藏之篋笥無忘仁者之言

報以瓊瑤有愧古人之意

謝楊參政啓

委在泥塗較錨銖於溝壑濯之江漢覩咫尺於雲霄荷
陶冶之深恩還冠裳之舊觀捫心知感策足來歸伏念
某一介疎愚半生流落簡編糟粕疲早歲之精神言語
風波動中宵之夢寐慣簞門而圭竇負句履而園冠篆
刻雕蟲聊以自嬉則可畫墁毀瓦將以求食則疎此蓋
伏遇某官篇翰六經聲華四海在布衣而懷公輔之器

游黃卷而得聖賢之心太學諸生願承誨於館下集賢
學士觀落筆於中書文滿簪纓眷深疏宸才名夙著何
止四十年之間時望自歸嘗冠千萬人之上為東觀石
渠之舊德厯螭坳鳳掖之清班辯裁清婉而兼二家之
長深厚爾雅而復兩漢之制從容詞禁密勿經惟果以
真儒聿登近輔揚雄而止耳未嘗觀非聖之書趙氏其
昌乎真能佐有道之主行啓金甌之覆更資木鐸之鳴
前疑後丞永贊千齡之運東漸西被悉符平昔之言

乾坤
圖書